

1. UVOD

Arbitražna odluka za Brčko Distrikt je tema ovoga rada i kao takva je istaknuta u samome naslovu. Međutim, proučavajući literaturu za ovaj rad primjetila sam da je vrlo malo naučnih radova obrađeno sa temeljnim pristupom ovom problemu. Zato mi je želja bila da pokušam u ovom radu istaknuti svu specifičnost ove tematike i obraditi je sa jednog šireg aspekta.

Da bi se bolje razumjela konkretna problematika arbitražnog postupka za Brčko Distrikt u prvom dijelu rada obrađen je institut arbitraže u međunarodnom pravu.

Institut arbitraže proučavan je od strane mnogobrojnih autora, te ga i u toku studija susrećemo u više pravnih predmeta kao što su poslovno pravo, međunarodno poslovno pravo, međunarodno privatno pravo, te državni menadžmet i pravna država. Koliki je značaj ovog pravnog instituta govori nam i činjenica da se na pojedinim pravnim fakultetima izučava arbitražno pravo kao posebna pravna cjelina.

U prvom dijelu rada iznesen je kratak istorijat arbitraže, njen pojam i karakteristike, pravna priroda, vrste arbitraže, te osnovni elementi arbitražnog sporazuma, arbitražnog postupka i arbitražne odluke.

Cilj tog izlaganja je bio da se odredi mjesto koje arbitraža zauzima danas u međunarodnom pravu, ali i da se lakše uoče specifičnosti arbitraže za Brčko Distrikt u odnosu na međunarodnu arbitražu uopšte.

Specifičnosti ove arbitraže koje je odvajaju od svih dosadašnjih arbitražnih praksi dovele su do stvaranja jednog zasebnog sistema koji egzistira u Bosni i Hercegovini uporedo sa drugim sistemima.

Kako je došlo do arbitraže za Brčko Distrikt? Koje su njene posljedice? Kakvo je ustavno određenje Brčko Distrikta, a šta on ustvari jeste? Ovo su samo neka pitanja na koja odgovor daju pojedina poglavlja ovoga rada.

Pri tome, Brčko Distrikt je posmatran isključivo kao pravni fenomen, a izlaganja su temeljena na pravnim činjenicama. Politički uticaj na ovu arbitražu kao i na Brčko Distrikt kao njen produkt se ne može osporiti, ali on nije bio tema ovoga rada.

Nakon uvodnih napomena možemo preći na razradu teme tako što ćemo prvo obraditi arbitražu u međunarodnom pravu, a zatim i sam arbitražni postupak za Distrikt Brčko.